

國學基本叢書
後漢書補注

五

書叢本基學國

注補書漢後

(五)

撰棟惠

行發館書印務商

中華民國二十六年三月初版
中華民國二十六年四月再版

本國學基後漢書補注五冊

(92354)

本書實價

每套五元五角

外埠酌加

匯費

撰者

惠

棟

發行人

王

雲

五

印刷所

商

務

館

發行所

商

務

館

上海及各埠

上海河南路

上海河南路

五一六八五平

鎮

後漢書補注跋

數百年來談漢儒之學者莫盛於今日而必以吳惠氏爲首庸元龍仲儒兩先生皆以翰苑起家父子傳述覃精抉奧至仲孺子定宇先生承兩世之傳而益擴之于是東西京流傳僅存之單文碎義推闡發明直接二千載以上久湮之旨以不囿於近世章句詁訓之俗學啟謬摘誤斯亦蕝苑振古之業也先生早擢家艱絕意仕進大吏嘗一以經學薦海內通人學士咸推挹以爲不可及所著書極富次第得當代大有力者爲之表明行世惟後漢書補注藏書家未得其本頗以爲恨先生中年後在揚日多客廬都轉署中最久儀徵汪對琴比部好古嗜學尤傾心於先生先生嘗病旅次爲親視藥餌危而復安所費殆及千金不以告也先生心感其意因舉是書稿本繕本盡詒比部遂不自有之比部懲郭象盜秀之非什襲珍護屢欲梓而絀於力其後家益落同里陳氏喜聚書比部因以繕本付之而自留槧本陳氏亦未及刻比部每向余言意殊悵悵比部既亡余從其令子假得稿本俱出先生手書件繫條舉鈔紙累累殊費尋繹先是焦孝廉循從稿本鈔錄一通余復假之焦互相讐校而陳氏子爲余郡學生因緣借得繕本雖比部令子亦未之見然尙有添注補錄雜綴於書之上方較稿本則已釐然易讀聞見積而愈富其功固無止境也書仿小司馬索隱式約三十餘萬言爲二十四卷實事求是彌覺章懷本注之疏略班史有三劉駿正并間見於叢說中而范獨未之及其天文五行等志尤精鑿不刊蓋先生貫串圖緯爲世絕學精心考

核其快處。真若撥雲霧而見青天也。余既手自寫錄。又乞朋好飲助之。是書有功范史。其精神終不能磨滅。顯晦有時。留以相待。因備述其詳。并錄于稿本。後而返之汪君。以無忘比部惓惓之古誼。稿本標名訓纂。先生向有精華錄訓纂。意蒙其稱。至繕本則定爲補注云。時嘉慶八年五月二日。寶山李保泰書。

作序後。偶讀潛研堂集中先生傳。紀後漢書補注十五卷。蓋先生旣以贈比部。不自留稿。門下士知先生用力於此者久。從所閱後漢書本。葺錄排纂。釐爲十五卷。流傳吳下。並非全書。焦孝廉親晤江良庭聲丈云然。丈卽先生高第弟子也。附志於末。庶後之讀者。不以十五卷之故。轉疑此本也。九年五月七日又書。

續漢志補注卷第二十二

郡國一

河南 河內 河東 宏農 京兆 馮翊 扶風 右司隸

注乃推分星次以定律度

王伯厚案通典云國之分野上配天象始于周季世紀所云蓋以星官之書自黃帝始也

自斗十一度

費直周易分野壽星起斗十度蔡邕月令章句壽星起斗六度陳卓云斗十二度

自婺女八度

費直起女六度蔡邕起女二度

至危十六度

陳卓云十五度

自危十七度

費直起危十四度蔡邕起危十度陳卓云十六度

自奎五度

費直起奎二度。蔡邕起奎八度。

自胃七度。

費直起婁十度。蔡邕起胃一度。

自畢十二度。

費直起畢九度。蔡邕起畢六度。

自井十六度。

費直起井十二度。蔡邕起井十度。

自柳九度。

費直起柳五度。蔡邕起柳三度。

至張十七度。

陳卓云十六度。

自張十八度。

費直起張十三度。蔡邕起張十二度。陳卓起張十七度。

自軫十二度。

費直起軫七度。蔡邕起軫六度。

今韓分野

陳卓云鄭之分野鄭玄案堪輿書壽星鄭也作韓者誤

自氏五度

費直起氏十一度蔡邕起亢八度

自尾十度

費直起尾九度蔡邕起尾四度

至斗十度

陳卓云斗十一度

注山海經禹使大章步自東極至于西垂

垂一作極

二億三萬二

一作三

千三百里七十一歩又使豎亥步南極北盡于北垂

垂一作極

二億三萬三千五百里七十五歩

案山海經無此文。淮南子墜形訓有之。又案論衡漢舊儀所引山海經。今皆無之。則知近所傳本非全書矣。海外東經唯有豎亥。其文亦異。高誘曰。大章豎亥。善行人也。郭璞曰。健行人。東西二萬八千里。南北二萬六千里。出水者。

一云出水之山者。

八千里受水者。八千里名山。五千三百五十經。

經字當在名山上。

六萬四千五百六十六里出銅之山。四百六十七出鐵之山。三千六百九。

以上皆中山經文也。案彼文九下有十字。

永壽二年。戶千六百七萬九百六。

戶。近本皆作二。

注陝津之難。以箕撮指。

興平二年事也。陝津。陝縣孟津。獻帝渡河。餘人爭赴船者。不可禁制。董承以戈擊披之。斷手指于舟中。者可掬。故云以箕撮指。

安邑之東。后裳不完。

見伏皇后紀。

河南尹

應劭曰。河南尹所以治周地。秦兼天下。置三川。守河洛伊地。漢更名河南太守也。

注。秦三川郡。高帝更名世祖都雒陽。建武十五年。改曰河南尹。

棟案。郡下所載沿革。皆司馬本注也。下倣此。

注。郡府聽事壁諸尹書贊。

應劭傳曰。父奉爲司隸時。並下諸官府郡國。各上前人像贊。劭乃連綴其名錄爲狀人紀。又謝承書載。朱穆爲冀州刺史。臨當就道。從事從爲書像。置聽事上。劉昫經籍志曰。漢明帝書讚五十卷。案此則諸郡皆有書讚。不獨河南尹也。

戶二十萬云云。

李心傳曰。西漢戶口至盛之時。率以十戶爲四十八口有奇。東漢戶口。率以十戶爲五十二口。可準周之下農夫。

雒陽。

棟案。東京有南北宮。相去七里。中央作大屋。複道三道行。天子從中道。從官夾左右。十步一衛。南宮有玉堂前後殿。卻非殿。宣室殿。嘉德殿。崇德殿。雲臺殿。九龍殿。廣德殿。安福殿。齋歡殿。銅馬殿。敬法殿。清涼殿。鳳皇殿。翔平殿。竹殿。黃龍千秋萬歲殿。又侍中寺。中黃門寺。畫室署。丙署。及雲臺。謬臺。皆在南宮。

北宮有德陽殿。章德殿。章德前殿。宣明殿。溫明殿。含德殿。天祿殿。壽安殿。迎春殿。永寧殿。溫飭殿。章臺殿。章臺下殿。又蠶室。掖庭。永巷署。朔平署。增喜觀。九子坊。皆在北宮。東觀在南宮。白虎觀在北宮。尙書闕在南宮。尙方在北宮。兩宮各有衛士主之。尙書省在神仙門內。太尉司徒司空府開陽城門內。司徒府中有百官朝會殿。正營校尉前後左右將軍府皆在城中。舊文殘闕。舉其大略如此耳。

褚

張呂反。又救呂反。

錡

魚綺反。陸氏云。

圍

魚呂反。

解

音蟹。

注。郟鄠陌。

京相璠曰。郟。山名。鄠。地邑也。說文曰。鄠。河南直城官陌地也。

注。鼎中觀。

左傳桓二年。臧哀伯曰。武王克商。遷九鼎于洛邑。服虔注曰。今河南有鼎中觀。

甘城。

京相璠曰。城在河南城西二十五里。有甘水。北入洛。

蒯。

苦怪反。

梁。

晉志曰。戰國時謂爲南梁。別少梁也。

注。城注。博物記曰。梁伯好士功。今梁多有城。

顧炎武曰。梁近秦國。注誤也。

滎陽。

劉寬碑陰作滎縣。有河濱廟。河堤謁者掌之。禮祠與五嶽同。見風俗通。

鴻溝水。注云云。

應劭曰。在縣東南三十里。博物志曰。一渠東南流。經浚儀。是始皇所鑿。引河灌大梁。謂之波溝。一渠東

經陽武南爲官渡。

隴城。

京相璠曰垂隴鄭地今縣東二十里有故隴城卽此是也。
敖亭。

詩云搏獸于敖鄭玄曰敖鄭地今近滎陽。

有費澤。

費澤無考案注及水經注當作滎澤。
卷。

字林音立權反韋昭音丘元反。

有長城云云。

酈元案竹書紀年梁惠成王十二年龍賈率師築長城于西邊自亥谷以南鄭所城矣竹書曰是梁惠王十五年築也。

原武。

酈元曰春秋之原國也。

圃田澤。

酈元曰澤在縣西西限長城東極官渡北佩渠水。

管城。

陸德明曰。本或作菅。古顏反。

注逢澤有介廩。杜預曰。在縣東北遠。疑非。

諸本皆脫非字。

苑陵。

前志作苑。又作宛。法雄傳作宛。王元賓碑亦作苑。案苑與苑古字通。陸氏音於阮反。又於元反。

有棐林。

水經注引司馬彪郡國志云。苑陵有林鄉亭。與此異也。史記蘇秦曰。兵困于林中。徐廣云。卽林鄉也。劉氏云。林地名。蓋春秋時鄭地之棐林。在大梁之西。棐音芳尾反。

注縣東南有林鄉。

諸本皆脫南字。

注左傳宣十年諸侯遷于制田。

此成公十六年事。注誤。

注縣東有制城。

依杜注城當作澤。

瑣。

素果反。

平陰。

應劭地理風俗記曰。縣故晉陰地。陰戎之所居。在平城之南。故曰平穀城。

前志作成。古字通以城爲成。見劉寬碑陰及韓勅別碑。

注。潛亭山。

前志作贊。音潛。

函谷關。

尚書大傳曰。隆谷元王。鄭玄曰。或作函谷。今河南穀城西關山也。文穎曰。舊在宏農縣衡山嶺。今移在此。衡一作衙。

緱。

古侯反。又苦侯反。

鄔。

烏戶反。

注。王取鄔劉。

杜預曰。縣西北有劉亭。

鞏。

九勇反。

注。湯亭在偃師。

諸本脫在字。

尋谷水。

京相璠曰。在鞏洛渡。東入洛。謂之下鄴。故有上鄴下鄴之名。亦謂之北鄴。

注。王師晉師圍鄴中。

案左傳云。王師晉師圍郊。癸卯郊鄴潰。杜預曰。縣西南有地名鄴中。

東訾聚。

昭二十四年。陰不佞獻玉。與之東訾。訾音子斯反。

坎埵聚。

姓氏英賢錄曰。坎氏。宋附庸也。服虔左傳解詁曰。鞏東邑。京相璠曰。鞏東地名坎飲。在洞水東。酈元據

晉太康地記。晉書地道記二書。言在鞏西坎。苦感反。飲。大感反。

注。地道記在南。

依水經注南當作西。

有黃亭。

京相璠曰。營城北三里有黃亭陌。

注。王子猛居于湟。

今左傳作皇。

注。有黃亭在縣西北。

今左傳注云西南。

注。昭二十三年。

三當作二。

注。賈辛軍于溪泉。

杜預曰。在縣西南。

旃然水。

杜預曰。水出縣東入汴。

有汜水。

春秋傳成四年。取汜祭。杜預曰。鄭地成皋縣東有汜水。孔穎達曰。字書。水旁已爲汜。水旁已爲汜。字相